



## МЕСЯЦА ОКТЯБРЯ В 12-Й ДЕНЬ

**Святых мученик Прова, Тараха и Андроника  
и преподобнаго отца нашего Космы святоградца  
и творца канонов, епископа Маиумскаго**

На Господи, воззвах: стихиры мучеников, глас 4.

Подобен: Дал еси знамение:

**В** лицé сокрушаемъ, и по выи ураняемъ, / и  
жéзлием раздробляемъ, / руками же изжигаемъ, и  
главú, мучениче, / и рожны\* прободаемъ лóте, /  
ушíма и устнама обрѣзуемъ, / и оцтом напаяемъ, /  
и зверём повергаемъ, / и мечем усекаемъ,  
мучениче, / веселился еси, Тарахе.

**Терпел** еси, биемъ, и рожны прободаемъ, / и  
лы́стом\*\* отрезаемым, очию лишаемъ, / и зверём,  
всеблаженне, в снeдь даваемъ, / и огню прибли-  
жáйся, и мечем главоусекаемъ, / мучеников удоб-  
рение и Церкви утверждение, / страдальче Прове  
славный, Ангелом равночестне.

**Огнём** сожигаемъ, и волóвыми жíлами биемъ, /  
струи стружемъ, по лы́стом кроимъ, / и Богослов-  
ный урѣзаемъ язык, / и зубы, мучениче, сýрово,  
Андрониче, искореняемъ, / со зверьми же сплетá-  
йся, и скончавáемъ мечи, / подвиг совершил еси и  
венец приял еси.

Ины стихиры преподобнаго, глас 4.

Подобен: Яко добля:

**Яко** мудрости ты питателя / и чистоты

\* рожны — железными рогами, остроконечными орудиями.

\*\* лы́стом — голеним, мышцам.

кормителя,/ сокровище знания, иерарше Космо́,/ Богословника известнейшаго, учителя Божественна,/ верным просветителя/ похваляем, блаженне,/ моляще тобою Владыку/ от тли и бед и всякаго вреда/ всем нам избавитися.

**Воздержанием** пожил еси,/ бдением же и постом, целомудрием и смирением, славне,/ разумом всячески обогатился еси/ нижних и привременных и Вышними светлыми/ и ясно возгремел еси/ недоуменное, страшное же и великое, блаженне,/ всех Царя строения таинство.

**Смиренному́др** и крото́к,/ тих же и доброглаголив, уветлив и незлобив,/ целомудрен и праведен,/ препрост и цел, преподобне Космо,/ ты быв иерарх от Бога священноявлён еси/ и упасл еси на злѣце вод спасительных/ стадо твое, Богомудре,/ тем ты ныне ублажаем.

Слава, глас 4. Анатолия:

**Вобинствовавшие** Христу,/ яже на земли красная остависте/ и крест на рамена взявше,/ мук ради многоплетенных Тому последовали есте/ и пред цари и мучители многими не отвергостеся Его,/ Ангели венцы победными главы ваша увязоша,/ дерзновеннии душею светло/ в Чертог великий внидосте,/ Прове, славо мучеников,/ Тара́хе, демонов губителю,/ и, Андрони́че, победоверных,/ дерзновение имуще ко Спасу всех,/ молитесь о душах наших.

**И ныне, Богородичен или Крестобогородичен.**

Подобен: Яко добля:

**Агница** и Пастыря, Ты на Древе яко ви́де/ Агница рождающая рыдаше/ и матерски Ти вещаше:/ Сыне Возжеленне,/ како на Древе Крестнем повешен еси, Долготерпеливе?/ како руке и нозе Твои, Слове,/ пригвозди́шася от беззаконных,/ и Кровь Твою излиял еси, Владыко!

На стиховне Октоиха.

Слава, мучеников,

глас 1: Андрея Иерусали́млянина:

**Трира́сленное** собрание,/ равночи́сленнии Святыя Троицы,/ якоже звѣзды светлыя,/ от



востока явльшеся,/ тварь созывают к священному торжеству,/ Пров и Тарах со Андроником мудрым:/ плоти бо своя зверем предаша/ и кровию землю обagrивше,/ венценосцы на Небесех со Ангелы ликовствуют,/ просяще о нас Человеколюбиваго Бога/ прегрешений оставление даровати и велию милость.

**И ныне, Богородичен или Крестобогородичен.**

**Подобен: Всехвальнии мученицы:**

**Заколение Твое неправедное, Христе,/ Дева зрящи,/ плачуци, вопияше Ти:/ Чадо Сладчайшее,/ како без правды умираеши?/ како на Древе висиши,/ Иже всю землю повешей на водах?/ не остави Мене единому, Благодетелю Многомилостиве,/ Матерь и Рабу Твою, молюся.**

**Тропарь мучеников, глас 5:**

**Святых мученик исправлением/ Небесныя силы преудивившася,/ яко в теле смертном,/ безтелеснаго врага силою Креста,/ подвизавшеся добре, победиша невидимо./ И молятся Господу/ помилдоватися душам нашим.**

**Слава, преподобнаго, глас 8:**

**Православия наставниче,/ благочестия учителю и чистоты,/ вселенныя светильниче,/ архиереев Богодухновенное удобрение,/ Космо премудре,/ ученьми твоими вся просветил еси, цевнице духовная,/ моли Христа Бога спастися душам нашим.**

**И ныне, Богородичен или Крестобогородичен.**

#### **НА УТРЕНИ**

**Канон Октоиха един и святых два. Канон мучеников, егоже краегранесие: Воспою мученик Твоих, Спасе, славу. Иосифово. Глас 8.**

#### **Песнь 1**

**Ирмос: Колесницегонителя фараона погрузи/ чудотворяи иногда/ Моисейский жезл, крестообразно поразив/ и разделив море,/ Израиля же беглеца, пешехода, спасе,/ песнь Божови воспевающа.**

**Мученическими украсени благодатьми,/ Венцедателю Христу на Небесех любовию, мученицы, предстоите,/ светом озаряеми Трисолнечнаго**

сияния,/ и вся просвещаете верою вас блажащия.

**В** гонении нечестия явистесья, всю прогоняюще злочестивую прелесть, мученицы непобедимии,/ доблественными подвиги, яко добрии воины,/ яко Цёркве утверждения и яко Истины держава.

**См**ысленным разумом, всемудрии,/ отразивше злобную бурю и свирёпеющеся море злочестия,/ духа тихостию к пристанищем преидёсте Небесным, радующеся.

**Душ**ам мучеников ваши срадуются, мученицы, дуси на Небесех истинно,/ Прóве, и Андронíче, и Тарáхе, блаженнии:/ мўжески бо болезни мучения претерпёсте,/ победами Божественными прославляеми.

**Богородичен:**

**И**же Отцу и Духу Святому Слово Собезначальное в девственную утробу, восхотев, вселися,/ и плоть невращно бысть, и пострадав волею,/ мученическая Божественная воинства верою страдати устроил есть.

**Ин канон преподобнаго, егоже краегранесие:**

**Косму похвалим песнотворца мудренно. Глас 4.**

### **Песнь 1**

**Ирмос:** Моря чермную пучину/ невлажными стопами/ древний пешествовав Израиль,/ крестообразныма Моисеовыма рукама/ Амалíкову силу в пустыни победил есть.

**Удобрив** добродетелей житие твое, отче Космо,/ светом и блистании светяся света Трисияннаго,/ Владыце твоему яко предстоя, просветитися тя поющим молися.

**Нрав** твой подобно являет тя, имея наречение:/ архиереев бо украшение, мудре, показался еси,/ и утверждение монашествующих, и мудрости обитель был еси.

**Мудрости** яко рачитель мудрейш, мудре,/ очистил еси твою душу, всемирный Космо,/ мирскаго смущения страсти отгнав, яко мглу омрачэния.



**Богородичен:**

**Марию** Непорочную и Чистую Отроковицу воспойм, / яко Божию Матерь благоговейно согласно прославляюще: / радуйся, Чистая Богоневесто, Благословенная Мати Дево.

**Песнь 3**

**Ирмос:** Небеснаго круга, Верхотворче Господи, / и Церкви Зиждителю, / Ты мене утверди в любви Твоей, / желаний краю, верных утверждение, / Едине Человеколюбче.

**Крепко** гонителю протівився, Тарахе, / и сокрушение лица терпя крепчайше, / челюсти сокрушил еси мысленных львов, / доблествен быв силою Духа.

**Великомудренным** разумом раны претерпел еси, / по хребту и чреву, мучениче Прове, растязаемь и поджигаемь, / и рожны перси, и Богославная твоя уста биема.

**Яко** агнец, вознесен быв, / терпел еси болезни лютейших ран, мучениче Андрониче, / огня попадания и искоренение зубов, / и Богословнаго твоего языка отъятие.

**Трисветлы,** яко звёзды, разумных сияний / всю, славнии, тварь просвещаете, тьму отгоняюще многобожия лести, / страсотерпцы, мученицы световиднейшии.

**Богородичен:**

**Яко** добру, яко красну / и яко избранну, Чистая, / Слово, Иже вся осуществовавшее Тя избрав, / в Твою непорочную и Богоприятную утробу, / восхотев, вселися Пресущественный.

**Ин**

**Ирмос:** Веселится о Тебе Церковь Твоя, Христе, зовущи: / Ты моя крепость, Господи, / и прибежище, и утверждение.

**Песньми** красными к песнословию / Христову возвеселил еси Невесту, / ясно изложив Христовы Божественныя тайны.

**Законы** ты воспитався Христовыми, отче Космо, / питал еси стадо, вверенное тебе, / православными повеленьми.

**В** себе огнем Божественнаго рвенія / распаляемую душу, преподобне отче Космо, стяжав, / вся ереси отгнал еси.

**Богородичен:**

**Преидоша** убо сѣни, Христос же Истина возсия,/ плоть приим, Мати Божия, от боку Твоею, и спасѣ ны.

**Кондак преподобнаго, глас 8.**

**Подобен: Взбранной:**

**Украшен** добродетельми, Космó Богодухновенне,/ Церкви Христовы украшение был еси:/ пѣсньми бо украсил еси сию, блаженне./ Но молися ко Господу избавитися нам от всяких козней ратника,/ тебе зовущим:/ радуйся, отче требогáте.

**Седален мучеником, глас 8.**

**Подобен: Премудрости:**

**Святая** Троицы крепкою вооружившесе верою юношески,/ Андроник, Пров же и всемудрый Тарáх/ многобóжия лести державу потребивша/ и люди к Божественной любви привязáша./ Тем победныя приимше почести,/ ликом свеселятся сил Безплотных,/ к нимже верою возопиим:/ молитве Христа Бога грехов оставление даровати/ чтущим любовь святую память вашу.

**Слава, преподобнаго, глас тойже:**

**Благочестием** и верою воспитáвсья,/ и премудростию украсив ум и душу,/ всех избегл еси земных попечений,/ особь же пожив и ум в неизреченныя вложив,/ великия сподобился еси благодати./ Тем и Божественную Христову Церковь украсил еси/ пѣсньми медотóчными и ученьми, святителю отче наш Космó:/ моли Христа Бога грехов оставление даровати/ чтущим любовь святую память твою.

**И ныне, Богородичен:**

**Премудрость** и Слово в Твоем чреве зачѣнши неопально, Мати Божия,/ миру родила еси мир Содержащаго/ и во объятях понесла еси вся Носящаго, Питателя всех и Творца твари./ Тем же молю Тя, Всесвятая Дево, и верно славлю Тя избавитися ми от прегрешений/ и в день Суда, егда предстати ѿмам пред лицом Создателя моего,/ Владычице Дево Чистая, Твою помощь тогда подаждь ми,/ вся бо можеши, елика хочещи, Всепетая.



## Крестобогородичен:

Агница, и Пастыря, и Избавителя/ Агница зрящи на Кресте, восклицаше плачущи,/ и, горько рыдаючи, вопияше:/ мир убо радуется, приѣмля Тобою избавление,/ утроба же Моя горит, зрящи Твое распятие,/ еже терпѣши за милосердие милости./ Долготерпеливе Господи, милости бездно и источниче неисчерпаемый,/ умилосердися и даруй согрешений оставление/ верою поющим Божественныя Страсти Твоя.

## Песнь 4

Ирмос: Ты моя крепость, Господи,/ Ты моя и сила,/ Ты мой Бог, Ты мое радование,/ не оставль недра Отца/ и нашу нищету посетив./ Тем с пророком Аввакумом зову Ти:/ силе Твоей слава, Человеколюбче.

Закон Твой соблюдающе, Слове, мученицы, беззаконных законы возненавидевше/ небрежѣи Тебе Творца повелевающия дѣмонскими ухищрѣньми,/ и все претерпевше треволнѣние мук, Небесную тишину получиша.

Любя Христово иго носить подвѣйное на выи твоей,/ еуже радуешься, сокрушаем,/ Крест же, жезл державный, Тарахе всеблаженне, силы имѣй,/ паличная умножения терпѣши, взывая:/ силе Твоей слава, Человеколюбче.

Яко силен Божественным быв Духом,/ листьев твоих болезненное мужественно, Прове, сокрушение и очес изятие претерпел еси,/ просвещаешь знанием Троицы, совершеннейше,/ и с Вышними лики, мучениче, сочетаяся.

Юношески, мучениче, предстал еси, Андрониче, пред судищем,/ противляясь врагу крепко./ Тем отрезая листья твоя, сильнейше содеваша ты,/ главу его попирающая и Горнее тебе шествие сотворяющая.

## Богородичен:

Едина Бога носиши во утробе воплощаемая, еже быти всем подающаго./ Егоже на трізници непреклонно исповѣдающа,/ пострадаша Божественнии мученицы, Дево Богородице Препетая,/ Ангелов чудо и демонов ѣзва.

## Ин

Ирмос: Вознесѣна Тя видевши Церковь на Кресте,/

Солнце праведное,/ ста в чине своем,/ достойно  
взывающи:/ слава силе Твоей, Господи.

**Предочистив** око твоего сердца страстного  
смущения, Космо иерарше,/ пение воспел еси  
красное и спасительное/ и Церковь просветил  
еси.

**Целение** всякаго уныния/ бывают твоя, Космо,  
всехвальная любящим песенная наслаждения,/  
догматами украшаемая и сладкогласия доброта-  
ми.

**Недугующую**, всеблаженне, Церковь/ хульны-  
ми веленьми Копронимовыми и блудивыми/ исце-  
лил еси писаньми, имиже сладкопесенно песно-  
пел еси.

**Яко** чудны твоя песни и всякаго, отче, испол-  
нены разума,/ имиже явственню всем открыл еси  
Христовы тайны,/ страшныя истинно и пречуд-  
ныя.

**Богородичен:**

**Пресвятую** воспойм Богородицу,/ Воплощен-  
ное родившую Божие Слово во дву естеству,  
Единой же Ипостаси,/ якоже Косма Божествен-  
ный научи.

### Песнь 5

**Ирмос:** Вскую мя отринул еси/ от лица Твоего, Свете  
незаходимый,/ и покрыла мя есть чуждая тьма  
окаяннаго,/ но обрати мя и к свету заповедей Твоих/  
пути моя направи, молюся.

**Неуклоннии** путешественницы стези узкия и  
жестокія бысте,/ напастей множество, яко пены  
морския отривающе,/ яко неразседнии столпи,  
сердца, стратотерпцы, яко на камени веры ут-  
вердивше.

**Витийствуя** Божественная и Богослова спаси-  
тельная учения,/ устен терпши растерзания,  
ума крепостию заграждая уста, на Бога, Тарахе  
мучениче,/ вредословие глаголющая сотворшаго.

**На** четверо протяжаем и ран язвами одержим,/  
душевное показуя доблественно востание./ Тем-  
же венценосец явлься с тождестрадалники,  
Прове,/ Царю всех предстоиши.

**Богородичен:**

**Больши** Горних сил еси Слово порождши



Отчее, Дево, / Собезначальное и Соприсносущее,  
Егоже светлостьми страстотерпцы  
озарившися, / безбожия ночь преидоша.

**Ин**

**Ирмос:** Ты, Господи, мой свет, / в мир пришел еси, /  
Свет Святый, обраща́яй из мрачна неведения / верою  
воспевающия Тя.

Вещание твое, мудре, во вся концы протече, /  
песнями возвеселя Божественными, Космо, хвалящих тя.

Закон естественных паче, — рекл еси, — /  
рождшую Пресвятую Богородицу Пребожественное Слово; / тем ты ублажаем.

Песни дивныя сладостно поя, / воспел еси неизреченное Владычне, /  
еже из Девы Пречистыя Рождество священнойше.

**Богородичен:**

Просветиша молния Твоего Рождества, Всепетая, всю вселенную, /  
и земля подвижеся от прелести к вере Его.

**Песнь 6**

**Ирмос:** Очисти мя, Спасе, / многа бо беззакония моя / и из глубины зол возведи, молюся: / к Тебе бо возопих, и услыши мя, /  
Боже, спасения моего.

Оружие Сильнаго бывше верою, / сердца зловерных мужески уязviste, /  
подвигшися на ня доблественно, страстотерпцы великоименити.

Яко древле Даниила в рове зверие устыдешася, /  
тако и ныне крепких оружников веры на тризници устрашишася, /  
укротившися честными их страдании.

Прободеным Твоим ребром, Владыко, / тожде образуя, Тарах приемлет в ребра прободение, /  
и оцтом напаяется, и огнем в главу люте попляется.

**Богородичен:**

Заченши без семене во утробе Превечнаго, Чистая, /  
и родила еси плотию естеством Безплотнаго, / и млеком поила еси Питающаго всех, Богомати Неискусобрачная.

**Ин**

**Ирмос:** Пожру Ти со гласом хваления, Господи, / Церковь вопиет Ти, /  
от бесовския крове очищшися, / ради милости от ребр Твоих / истекшею Кровию.

**Словеса твоя, яко сот сладкий, явѣшася, /  
благочестивыхъ сердца веселяща, / поющихъ Кре-  
щение Спасово, Сретение же Симеоново и отпу-  
щение.**

**Не словесы, но вещь ты представил еси: /  
востание, блаженне, Лазарево из мертвых, и  
детей хваление, / и зависть иудейскую,— в  
песнях.**

**Возвышение Трехблаженнаго Древа украсил  
еси, / воспев песнь веселия всяческаго  
исполнену / и радости сущия в пении того, все-  
блаженне.**

**Богородичен:**

**Глаголом Твоим Богодухновенным, Отрокови-  
це, последующе, / Тя блажим вси роди, Дево, / яко  
Бога Блаженнаго Блаженную бывшую Родитель-  
ницу.**

**Кондак мучеников, глас 2.**

**Подобен: Вышнихъ ища:**

**Троицы нам славу явѣша, / доблии Христовы  
оружницы и мученицы, / с Тарахом Пров же и  
Андроник: / обличаща бо все мучителей безбо-  
жие, верою доблественно страдальчествовавшие.**

**Икос:**

**Иисусовы страсти доблественно подра-  
жавше, / купно с Тарахом мудрым Пров же  
и Андроник, / радуящися, пострадаша на тризни-  
щи, незаконныхъ обличающе безбожие. / Тем и  
мы, любовию чтуще память их, / в песняхъ похва-  
лим и верно подвиги проповѣдаем: / яко дивен бо  
Господь, светильники в мире прославив сия, /  
верою доблественно страдальчествовавшия.**

**Песнь 7**

**Ирмос: Божия снизхождѣния / огонь устыдѣся в Вавило-  
не иногда, / сего ради отроцы в пещи радованною ногою, /  
яко во цветнице, ликующе, пояху: / благословен еси,  
Боже отецъ нашихъ.**

**Ушесъ отъятие претерпел еси, радуяся, Тарахе  
славне, / яко благопослушлив раб Приклоншаго  
тебе ухо милостивнейшее / и молитвы твоя Со-  
вершившаго, зовуще: / благословен еси, Боже  
отецъ нашихъ.**



**Протязáеми мученицы и му́ками рáни-ми / твердым смыслом пребеззакóннуюющим сопротивистеса, / и, победоносцы бывше, поете: / благословен еси, Боже отец наших.**

**Исполнися дух твой Божественныя росы и прохлаждения, / егда рúце огнём и главу попаляху ти, / и, якоже дети, взывал еси, Тарахе: / благословен еси, Боже отец наших.**

**Кроплéнием, святии, честных кровей ваших прелести углие погасисте, / росу Божественныя нам источающе благодати / и исцеления проливаете воды, хвалящим вашу память всегда.**

**Богородичен:**

**Истощевается во утробу Твою, Отческих недр не оставль, Совершеннейшее Слово, / и плоть видится, и Младенец раждается, / Емуже поем, Дево, радующеса: / благословен еси, Боже отец наших.**

**Ин**

**Ирмос: В пещи Авраамстии отроцы персидстей / любви благочестия паче, / нежели пламенем, опаляеми, взываху: / благословен еси в храме славы Твоея, Господи.**

**Веселится всяка душа, / песнопения твоя, Богомудре отче, прочитаючи и верою зовущи: / отец наших Боже, благословен еси.**

**Воистинну язык твой — / трость книжника скорописца, отче, бысть Святаго Духа, / писавший великая чудеса Слова.**

**Закон побеждается о тебе похвалении, отче, / ни бо имать, что хвалению достойно вещати, / тебе Владычняя изрекшу величества.**

**Богородичен:**

**Кий Тя язык земных достойно ублажит, Бога рождшую, Богоневесту? / Тем верою зовем: / радуйся, Дево Чистая, радуйся, Препрославленная.**

**Песнь 8**

**Ирмос: Седмерицею пещь / халдейский мучитель / Божечивым неистовно разжжé, / силою же лучшею спасены сия виде, / Творцу и Избавителю вопиаше: / отроцы, благословите, / священницы, воспойте, / людие, превозносите во вся веки.**

**Просвещени язвами и красными добротами добротворнаго и чуднаго страдания / Господу**

предстоите, венценоscopy вси, / Света тамо сущаго, испущаема богáтно, исполняеми и любовию поюще непрестанно: / отроцы, благословите, / священницы, воспойте / людие, превозносите во вся веки.

**В** себе неистовся пребезумный мучитель, / яко побежден вашими противлении, / вскоре повелевает уморити мечем вас, Содетелю и Избавителю поющия: / отроцы, благословите, / священницы, воспойте, / людие, превозносите во вся веки.

**Т**роицы побóрницы, добропобеднии мученицы, / иже безбожия зиму разорше теплою веры, / верных предстолие, цвѣти краснии умнаго рая, / пристанища сущим в бури, непреклоннии столпѣ, / Андронѣк, и Пров, и Тарáх почитаются.

**Богородичен:**

**Со** Безплотными чинми, / с мученик воинствы, со апостолы и пророки, / всеми владычествующую тварьми Владычицу яко Херувим святейшу / и Едину Божию Чистую Матерь благочестно поем, / Христа превозносяще во вся веки.

**Ин**

**Ирмос:** Руце распротер Даниил, / львов зияния в рове затче, / огненную же силу угасиша, / добродетелию препоясавшися, / благочестия рачители, отроцы взывающе: / благословите вся дела Господня Господа.

**Жезлом** укрепляеми твоих догматов, славне, / ты хвѣлящии отвращаемся всяких еретических злоб / и песнопоем благочестно Христу, зовуще: / благословите вся дела Господня Господа.

**Всех** яко выше умом, Космó, быв, / вѣчерю написал еси, в нейже предал есть Господь Живоносныя Тайны / и предание страшное, безчеловечие же Иудино, / егоже и бежати нас научил еси.

**Света** Невещественнаго зарями осияем, Космó всепреподобне, / Страсти пречистыя написал еси, / и погребение, и Востание, и Преображение Христово, / научив вся воспевати: / благословите вся дела Господня Господа.



**Богородичен:**

**Жезл** из корене Иессеева Ты израстила еси, Дево Пречистая, / Цвет, Господа, рождающая, нас благоухавшаго / миродыхательными вонями Страстей Его, / тем вси Тя благословим, Марие Богоневесто.

**Песнь 9**

**Ирмос:** Устрашися всяк слух / неизреченна Божия снизхождения, / яко Вышний волею сниде даже и до плоти, / от Девическаго чрева быв Человек. / Темже Пречистую Богородицу, вернии, величаем.

**Возмогша** телесы тленными нетленныя подвиги пристязати, доблественнии, / и, Ангелом уподобишася, Царство Божие приемше недвижимое, / Пров, и Тарах, и Андроник, Христовы угодницы.

**Явистеся** углие, Огнем Невещественным таинственне вжигаеми, / и пожгосте вещественную леть, великомученицы, / и, возсиявше, яко свет, тварь озаряете / и спасаете от страстей и бед души наша.

**Днесь** приносит празднство летнее светло и радостно Церковь Христова, / Божественное сие ваше торжество, / и веселятся с вами пророцы, апостоли и вси мученицы, / страстоносцы, победители великоименити.

**Взятеся** в световидная райская, страстоносцы, селения, / одеявшеся светлою ризою, юже исткасте многовидными муками, / и Престолу предстоите Вседержителя, / о всех прилежно молящися.

**Богородичен:**

**Пощади** мя, Спасе, рождейся и сохранивый Рождшую Тя нетленну по Рождестве, / егда сядеши судити вся дела моя, / беззакония и грехи моя, презри яко Безгрешен, / Милостив яко Бог и Человеколюбец.

**Ин**

**Ирмос:** Камень нерукосечный / от несекомыя горы Тебе, Дево, / краугольный отсечеса, / Христос, совокупивый разстоящаяся естества, / тем веселящися, Тя, Богородице, величаем.

**Богат**, благороден быв, всеблаженне, / добродетельными зарями сияя и просвещая верныя,

Космо, / ты хвалами почитающия и православно поющия: / ты величаем, трисвяте.

**Закóны сияя Божественными / и теми, блаженне, твое стадо якоже на пажить живонóсную наставив, / яко подобаше, преподобне, к Небесém преставился еси, / плоды болéзней твоих пожиная.**

**Показася тебе незаходяй Свет, / ныне представльшуся тебе от привременных, яко очищенному праведно, / яснее же и честнее Егоже наслаждаяся, / помни тебе почитающия, достославне.**

**Богородичен:**

**Тя, Пресвятую Деву и Серафим сла́внейшу, / рождшую Христа, Богородице, / пребезначально возсиявшаго от Отца, якоже писано есть, / славословяще, ублажаем.**

**Светилен Октоиха. И святых.**

**Подобен: Учеником зрящим:**

**Триплетённый лик страстотерпец, / Тара́ха и Прова вси со Андрони́ком, песньми хва́льными увенчаем: / строгания бо претерпеша, и лютыя раны, и болезни / и со Христом царствуют.**

**Богородичен:**

**Херувим явилася еси сла́внейши и Серафим показалася еси в́ышши, / яко Бога Рождшая воплощенна, / земным же показавшаго стези правыя шéствовати, ко спасению водя́щая.**

**На Литургии: прокимен глас 4: Святым, иже суть на земли Его, удиви Господь вся хотения Своя в них. Стих: Предзрех Господа предо мною в́ыну: Апостол ко Ефесéом, зачало 233. Аллилуия, глас 4: Воззваша праведнии, и Господь услыша их. Евангелие от Луки, зачало 106. Причasten: Радуйтесь:**







**Празднование святому Иоáнну,  
Крестителю Господню, на память пренесения  
из Мáльты во град Гáтчину креста  
из части Дрéва Животворящаго Крестá  
Господня, Филéрмскаго чудотворнаго образа  
Бóжия Мáтере, писаннаго святым  
Евангели́стом Лукóю, и десны́я руки мощей  
свята́го Иоáнна Крестителя**

**В  
ТОЙЖЕ  
ДЕНЬ**

**НА МАЛОЙ ВЕЧЕРНИ  
Стихиры на 4, глас 8:**

**Д**несь возсия память твоя, Предтече, / яко светило вéлие лучи обильныя чудес излива́ющи, / благочестивых серде́ц озаря́ющи, / и утешение пода́ющи всем с верою приходя́щим и покланя́ющимся тебе, / заступнику и поборнику земли Росси́йския, / и теплому молитвеннику о душах наших.

**С**ветлое торжество духовное устро́яет нам рука твоя, Предтече, / соводворит́ся бо с нами, почита́ющими тя усердно, пришел еси ви́димым образом, / принося́щи дары Божественныя благодати, / сего ра́ди к тебе взываем: / буди нам помощник, и ходатай, и руководитель, / на спасения стези́ наставля́ющий.

**Д**несь пала́та присносвѣтла является / пришествием тебе, светильника невечерняго Света. / Торжествует град, его же благословляет десница твоя, Крестителю. / Светло празднуют благовернии лю́дие, вхожде́нием ея осеня́емии, / и покланя́ясь тебе, глаголю́т: / избави молитвами твоими от всякаго зла, / находя́щаго за множество прегрешений на рабы твоя.

**Б**ожественное сокровище и богатство неистощимое / даровася державному граду десница твоя, Предтече Господень, / и положи́ся че́стне в Божественном храме, / и бысть духовнаго веселия вина́ тепле любя́щим тя, пророков верховнейший, / иде́же свя́щенно собравше́ся, / воспеваем тя благодарным сердцем, яко новаго

Авраама, / пресельника к нам преславна и молитвенника о душах наших.

**Слава, глас 6:**

**Крест Твой, Господи, / оружие на враги видимыя и невидимыя нам даровася, / да будет убо невидимая сила его / огонь, пополаяя лица сопротивных, / хотящих брани неправедно.**

**И ныне, глас тойже:**

**Простёрши Божественныя руке Твои, / ймиже Создателя воплотившагося носила еси, / умоли Его, Всеблагая Владычице, / избавити от искушений и страстей, и бед / любовь чтущих святую икону Твою, Приснодево.**

**На стиховне стихиры, глас 2:**

**Идёже осеняет рука твоя, Христов Предтече, / тамо струи благодати, от Бога тебе данныя, изливаются обильно, / страхом отбегают демоны, / различныя человек исцеляются страсти и недуги, / плоды духовных дел процветают, благочестие утверждается, / и вси приходящии и прикасающиися ея, / зарею Божественнаго света просвещаются / и спасаются молитвами твоими.**

**Стих: Благословен Господь Бог Израилев, / яко посети и сотвори избавление людем Своим.**

**Светильник горя и светя от Богочеловека наречён был еси, Крестителю, / мы же возрадуемся в день сретения твоего, / егда десницею твоею Отечество наше озарити восхотел еси, / к ней же с любовью притекающе, / воспоминаем Божественное учение и Ангельское на земли житие твое, / емуже подражати сподоби славящих тя.**

**Стих: И ты, отроча, / пророк Вышняго наречешися.**

**Зряще телесныма очима святую твою руку, / умными очесы зрим тебе, ангела, / егоже послá в мир Великаго Совета Ангел, / пред лицем Своим уготóвати пути Его / крещением покаяния во оставление грехов, / Провозвестниче, исправи стези заблуждения молитвами твоими.**



## Слава, и ныне:

**Преклонившись** свыше **Всецарица Мати** и **Дева,** / **благословенными венчаёт** **воспевающих Ю,** / **и сице молящихся:** / **Надеждо христиан,** **сподоби смиренных нас** **Небеснаго Царствия,** / **ничтоже бо не возможно** **ходатайству Твоему.**

## НА ВЕЛИЦЕЙ ВЕЧЕРНИ

**По обычном псалме поем Блажен муж:** 1 **антифон.** **На Господи,** **воззвах:** **стихиры на 8,** **глас 5:**

**Руку твою,** **прикоснувшуюся пречистому верху Владычню,** / **с нею же и перстом Того нам показал еси,** / **воздежи о нас к Нему,** **Крестителю,** **яко дерзновение имея много,** / **ибо болий пророков всех от Него свидетельствован еси.** / **Очи же твои паки Всесвятаго Духа видевшия,** / **яко в виде голубине сошедша,** / **воздвигни к Нему,** **Крестителю,** / **и милостива нам соделай,** / **и прииди,** **стани с нами,** / **запеча́тай пение и предназначаяй торжество.**

**Первое к антиохийскому народу** **рука твоя** **благодатная** / **яко дар Божественный Лукою Евангелистом перенесёся,** / **таже восточным царём Багрянородным даровася.** / **Ныне же от запада приходит** **благословити народ российский,** / **изливая струи Божественныя благодати.** / **Крестителю Христов!** **всех нас помяни,** / **да избавимся от бед и скорбей;** / **тебе бо дадётся благодать молиться за ны.**

**Да устроиши** **пути Господни** **и стези правы** **сотвориши Богу** **в человецех,** / **да уготовиши** **Господеви люди** **российския** **совершенны;** **прежде пришествия твоего** **посылаеши к ним священные дары твоя,** / **последи же,** **аки сам с Небесе яве** **приходя посетити избранный тобою христианский народ,** / **десницу твою Божественную** **нетлением прославленную,** **подаеши нам,** **Крестителю,** / **во еже просветити и озарити мысли верных и укрепити в благочестии.** / **Темже духовными песньми** **все согласно тебе** **вопием:** / **Пророче и проповедниче Истины!** / **моли спасти** **ся всем** **людem** **страны** **нашея.**

**Днесь возсия** **в концев северных,** / **яко светносное солнце,** **рука твоя честная,** **Крестителю!**

Агнца Божия плотию явившагося, всем показавшая, / и покаяния спасительныя пути; / юже, яко сокровище Божественных даров, верою приемлюще, / и со страхом прикасающесе, и покланяющесе любовию духовною, / приемлем от тебе, Христов Предтече, источник исцелений, / просвещение душ, благодать утешения и велию милость.

**Т**оржествует духовно ликующи Христова Церковь / в принятии мощей твоих, Предтече, / град освящается и вси православнии людие вопиют: / Крестителю Христов! ты наша крепость и утверждение, / ты наша доброта и тобою хвалимся, / моли Христа Бога спасти любовию тя славящия.

**И**исус одолеваше и побеждаше Амаліка, / егда руце Моисеевы простертыя в молитве ко Господу поддержаста Аарон и Ор; / тако сотвори Господь российскому воинству побеждати всегда и одолевати враги, / егда благоговейно твою пречистую руку приемше, держаху, и усердне лобызяху, / просяще с верою помощи во бранех и победы на сопротивныя.

**Б**ездна неизчерпаемая Божия благодати, / за принятие с верою и благоговением десницы Пророка, / мзду пророчу вскоре воздает христианом, / их же да сохранит, сице благоволивый Бог, / молитвами твоими, Предтече.

**Е**фрема и Манассию целомудренный Иосиф приводит к патриарху Иакову, / да благословением и возложением рук святого Израиля / снідет вседействующее Божие благословение на сыны его; / ныне же мы, подклоня главы под твою, всеблаженне, многомощную десницу, / молим тя со слезами, Крестителю, / да твоих ради заслуг снідет на нас всеильное благословение Всевышняго.

**Слава, глас тойже:**

**В**елия слава твоя, достохвальне Предтече, / деснице бо твоей главу Свою преклони Иисус, / Господь господствующих и Владыка владеющих. / Велие человеколюбие Свое Всеблагий Бог



показá на нас,/ егда благоизвóбли сию даровати нам, яко Богосветлое украшение и утверждение,/ темже радостно воспоем Промыслителю нашему сию хваления песнь:/ Велий еси, Господи, и чúдны дела Твоя.

**И ныне, Богородичен, глас 8:**

**Пёрвее написавшейся твоей иконе Евангельских таин благовестником,/ и к Тебе, Царице, принесённей:/ да усвóиши ту и сильно соделаеши спасти чествúющия Тя,/ и порадовалася еси, яко сущи милостива спасения нашего Соделательница,/ и, на ту зрящи, глаголала еси со властью:/ с сим образом благодать Моя и сила,/ и мы истинно веруем, яко се рекла еси, Госпоже./ Сим образом с нами пребúди,/ ему же благоговеино предстояще, поклоняемся Тебе, раби Твои,/ посети ны матерними Твоими щедротами.**

**Вход. Прокимен дне и чтения три.**

**Исхода чтение (глава 14):**

**Рече Господь к Моисею:/ возми жезл твой и простри́ руку твою на море, и расторгни é./ Простре же Моисей руку на море, и разступися вода./ И внидо́ша сынове Израилевы посреде́ моря по сúху; и вода им бысть стена одеснúю и стена ошúюю./ Погнаша же егíптяне, и внидоша в след их всяк конь фараонов и колесницы и всадники посреде́ моря./ И простре́ Моисей руку на море, и устроися вода ко дню на место;/ егíптяне же бежаша под водою./ И, обратившись, вода покрý колесницы и всадники и всю силу фараонову, вшедши в след их в море,/ и не оста́ от них ни един./ Сынове же Израилевы проидо́ша по сúху посреде моря.**

**Царств третьих чтение (глава 8):**

**Ста Соломон пред лицом жертвенника Господня пред всем собором Израилевым./ И воздеи руке свои на небо, рече:/ Господи Боже Израилев! несть бог, якоже Ты на Небеси горе и на земли нíзу./ Аще небо, и Небо небесе не довлеют Тебе, кольмí паче храм сей, егоже создах Имени Твоему,/ и да при́зриши на молитву мою, Господи Боже Израилев,/ еюже молится раб Твой пред**

Тобою к Тебе днесь./ Да будут очи Твои отверсты на храм сей день и ночь, на место сие, о нем же рекл еси:/ будет Имя Мое тамо, еже услышати молитву, еюже молится раб Твой на месте сем во дни и нощи./ И услышиши мольбу раба Твоего и людей Твоих Израиля, о них же помолятся на месте сем,/ и Ты услышиши на месте обиталища Твоего на Небеси;/ и сотвориши, и милостив им будеши.

**Премудрости Соломоновы чтение (глава 4):**

**Праведник** аще постигнет скончати, в покои будет./ Осудит же праведник умирая живущия нечестивыя;/ узрят бо кончину праведнаго и не уразумеют, что усове́това о нем, и во что утверди́ его Господь:/ приидут бо в помышление согрешений своих ужасни, и обличит их противу беззакония их./ Тогда станет в дерзновении мнозе праведник, пред лицом оскорбивших его и отметающих труды его./ Видевше же его смятутся страхом многим, и ужаснутся о преславном спасении его./ И рекут в себе, кающесе:/ сей бе, егоже имéхом некогда в посмéх и в притчу поношения./ Безумнии, житие его вменихом неистово, и кончину его безчестну./ Како вменися в сынех Божиих, и во святых жребий его есть;/ убо заблудихом от пути истиннаго, и правды свет не облиста нам, и солнце не возсия нам./ Беззаконных исполнихомся стезь и погибели, и ходихом стези непроходны, / пути же Господня не разумéхом.

**На литии стихиры, глас 1:**

**Глас сый** вопиющаго в пустыни,/ Пророк и учитель обличил еси велехвальные фарисеи, глаголя к ним:/ порождения ехиднина, сотворите плоды достойны покаяния,/ ныне Божественною десницею твоею, православными Россианами любезне почитаемую,/ показуеши ясно перст Божий, / наказующий нечестие презрителей веры, отвергших тя,/ отягощаючи над ними руку благочестиваго воинства,/ и расточаючи их яко овцы, неимущия пастыря,/ покайтесь, вопия,/ да не когда во веки прогневается Господь,/ и погибнете от пути праведнаго.



**Б**огоотступный Иулиан, лютѣйший злѣбою Ирода, / тѣшиши истребити в правоверных всю святыню, / искаше сожеши руку твою, Предтече; / но вотще шатаяся, вскоре погѣбе с шумом нечестивый. / Поборник же благочестия российский народ, благоговейно сию почитая, / яко светильник на свещнице, во святем храме поставляет ю, и хранит святолепно; / тем же утвердити страну нашу в мире, и сохранить вся люди молися, Предтече, / теплый предстатель наш ко Господу.

**Л**юбовию уготовавших тебе златокѣванный ковчег благолѣпнейший, / в нем же святая десница твоя чѣстне положиши, / воздая богато приношения, / храм Духа Божественнаго сотвори ходатайствы твоими, Крестителю, / зарею Божия премудрости освещая во вся дни, / во еже стояти им в Православии непоползновенно.

**К**оль благ Бог Израилев правым сердцем, / прежде еже родитися провидящий издалече достойных Того благодати, / чудодействующую бо в дальних странах десницу праведника, / взимая от лица неправды и ущедряя, ея же восхоте ущедрити, / вручает напоследок дней многобогатый дар сей стране нашей, тайно вещая: / примите залог Моея благодати, благодати тезоименитаго. / Се дах его стража страны ваша, / видите, яко рука Моя сотвори сия вся.

**Слава, глас 8:**

**Д**аждь славу Богу твоему, Россие! / Яко Прославивый тебе доселе множеством святых, не оставляет прославляти и ныне. / Се бо многоценное сокровище, в различных странах доселе сокрываемое, / благоизволи даровати тебе многочудесную руку Предтечеву, / оружие мирно, утверждение державно, стѣну необориму / и невредимое сопротивными ограждение новому Сиону.

**И ныне, глас 2:**

**П**редстоя пред Твоим, Всечистая, образом / все христоименитое людей множество, достойно блажат Тя, Матерь Божию, / и прославляют работлепно, и чествуют и молятся Тебе по Бозе, / да

мир умирѣши в православии, и веру утвердиши, / и спасеши от всех зол Твоя рабы, едина Благословенная.

На стиховне стихиры, глас 2:

Действуяй вся во всех, Боже, / неизреченную милость Твою явил еси нам, / подая благословение рукою пророков верховнейшаго, / о всех дѣлах Твоих благодарение Тебе приносим.

**Стих:** Благословен Господь Бог Израилев, / яко посети и сотвори избавление людем своим.

Весь Богоносен явился еси, Крестителю, / егда рукою твоею прикоснулся еси верху Владычню, / слухом же Родителей глас слыша и очима сошествие Святаго Духа узрѣл еси, / тем же и нас, почитающих Богоноснаго тела твоего останки, / сотвори сосуды чѣстны к принятию даров Божественныхъ благодати.

**Стих:** И ты, отроча, / пророк Вышняго наречешися.

Перстом десницы твоея / древле показал еси людем грядущаго к тебе креститься Агнца Божия, / взѣмлющаго грехи всего мира; / ныне же предлежащими персты, / нетлением сияющими, и благочестно от всех почитаемыми, / загладив неведения начертание, / напиши на скрижалех сердец наших Боговедение поклоняемыхъ Троицы.

Слава, глас 8:

Неизчетный в милости, Боже наш! / Праведных ради обещавай не погубити грешных на земли, / повелел еси тѣя в молитву призывати, / и ныне, молящеся Тебе, Благоутробне, / приводим в молитву честнаго пророка Твоего угодника, / да его ради пощадиши нас, избавляя от всех искушений и бед, / и спасеши души наша.

И ныне, глас тойже:

Крепкое заступление и стѣну нерушиму стяжавше, / всечестную и чудотворную икону Твою, Богомати, / молим Тя православным христианом победы на враги даровати / и спасти достояние Твое.



На благословении хлебов: Тропарь, глас 2:

Память праведнаго: или сей, глас 4:

От запада возсиявши Предтечева рука, / лучи испускает нетления верным исцелений, / свыше собирает множество Ангел, / доле же созывает человеческий род, / единогласно возсылати славу Христу Богу.

#### НА УТРЕНИ

На Бог Господь: тропарь Предтечи, дважды. Слава, и ныне, Богородичен воскресен по гласу тропаря.

По 1-й кафизме седален, глас 4:

Воистинну пророков бóльший нареклся еси, Иоанне, / они бо по рождестве своем прорóчествовала, / ты же, Крестителю, еще сый во чреве матери, сподобился еси таковаго дара, / и был еси первейший благовестник воплотившагося Избавителя, / устна́ми бо матери твоея Богоизбранней Отроковице вещал еси: / отку́ду мне сие, да прииде Мати Господа моего ко мне? / Сего ради вопием тебе: / радуйся, зерца́ло, тайны Божия нам являющее.

Слава, и ныне, Богородичен:

Тебе вси роди человечести хва́льные дары приносят, Владычице, / и молятся яко Царице и Матери Божией, / покрый и соблюди, Госпоже, молитвами Твоими, / и спаси от бед души наша.

По 2-й кафизме седален, глас 8:

Похвали́ Бога твоего, граде Петро́в, / и да возвеселятся сердца́ православных христиан; / яко благоизволи Вышний даровати нам десницу покаяния проповедника, / в рожденных жена́ми бóльшаго Иоанна, покрывающаго и защищающаго град и люди, / егоже почитающе, возвеличим Бога нашего, / давшаго нам священный залог милости Своея.

Слава, и ныне, Богородичен:

Поклоняющеся образу Твоему, Богомати, вернии раби Твои, / молим Тя, в день Судный избавити нас, и сподобити Царствия Небеснаго, / Марие Благословенная, православных похвало.

Таже полиелейныя псалмы, по сем величание:

Величаем тя, / Крестителю Спасов Иоанне, / и почитаем вси / честны́я твоея руки пренесение.

**Стих:** Блажен муж, бояйся Господа:

**Стих:** Направити ноги наша на путь мирен.

По полиелеи седален, глас 8:

**Закона** гласи неясни быша и косноглаголанне Моисеево / словеса благодати в гаданиих изъяви; / ты же начало Евангелия сый, светлый глас вопиющаго нареклся еси, / ясно бо возвестил еси пришедшаго в мир Спасителя, / Егоже моли о нас, Предтече.

Слава, и ныне, Богородичен:

**Приступите** с веселием, Богоизбраннии и христолюбивии людие, / и честный образ Богоматере любезно примите; / се бо щедрот море неизчерпаемое, источник сладкий изливает благодати, / от негоже вси спасение почерпаем.

Таже степенна, 1-й антифон 4 гласа. Прокимен: Тамо возвращу рог Давидови, / уготовах светильник помазанному Моему. **Стих:** Враги Его облеку студом, / на Немже процветет святыня Моя. **Евангелие от Луки, зачало 31.**

По 50-м псалме стихира самогласна, глас 6:

**Плотскаго** пришествия Христова начало, / пророков конец и глас Слова сый, взывал еси: / покайтесь, приблизися бо Царство Небесное; / темже уготовавый пути Господни, / благодати предшественник явился еси, Крестителю и Апостолу, / моли Христа Бога, прегрешений оставление даровати / празднующим любовию святую память твою.

Канон Предтечи со ирмосом на 8, глас 1.

Песнь 1

**Ирмос:** Твоя победительная десница / Боголепно в крепости прославися; / та бо, Безсмертне, / яко всемогущая противныя сотре, / Израильтяном путь глубины новосоделавшая.

**Устне** нечисты, и сердце, и глас недостойный / движу к тебе на моление, Крестителю Христов, / но ты глас Слова и орган Духа Божия сый, / потщися на помощь, / сердце просвети, ум мой озари светом Богоразумия и слово ми вдохни, / да возмогу воспети с любовию величия твоя.

**В** молитвах Господеви предстоя, / якоже звезда Солнцу предтекий, / радости Небеснаго рая неизреченныя исполняяся, / Безсмертному Царю,



в безконечныя веки от Ангел безпрестанно хвалимому, / присносущное с ними возсылая славословие, / помяни нас на земли призывающих тя, Крестителю.

**Д**руг искренний Владыки быв, Крестителю всеблаженне, / укрепи нас любити Его нравом правым / и страстей тлетворных возгнушати, влекущих к гибели.

**В**иновное спасения нашего всечестное Древо Креста, / подлежащее видяще, / вернии почтим и радостно облобызаем, / источающее нам освящение, и жизнь, и лютых избавление.

**Богородичен:**

**Я**коже родством естественным совокуплени, / тако и молитвенным согласием, вы едино суще, / Мати всех Царя и Божественный Предтече, / мольбу сотворите вкупе к благоуветливому Владыке, / да вашими ходатайствы преклонься, / ущедрит и спасет люди Своя.

### Песнь 3

**Ирмос:** Еди́не ве́дый человеческого существа немощь, / и милостивно в не вообра́жся, / препояши мя с высоты силою, / еже вопити Тебе, Святы́й: / одушевленный храме неизреченныя славы Твоея, Человеколюбче.

**П**одвигом добрым подвизався, течение скончав мечным усекновением, / во светлости Небеснаго Иерусалима внити и ликовствовати с Безплотными сподобился еси; / и ныне с Небес простирая к нам отеческия объятия, / рукою твоею привлещи всех в ограду Христову потщися, Крестителю, / наставляя на путь покаяния тебе величающия.

**С**выше нас ныне назирая, всеблаженне, / твоими молитвами от тли и бед сохрани, / Божественному проповеданию твоему верно последующих / и пребывающих во учении спасительных твоих догматов.

**Б**олий в рожденных женами, / именуемый от Премудрости Вечныя, / буди нам премудрости и смысла ходатай; / да сподобимся с мудрыми девами внити в Чертог вечныя Божественныя Славы.

**Ж**езлом чудесным, Креста знамением от камене неплодна воду людем Твоим источивый,

Боже, / от неплодныя Елисаветы покаяния проповедателя миру даровав, / десницею его нас обогатил еси, / вся преславна твоя, Всесильный Владыко.

**Богородичен:**

**Я**ко венцем пресветлым благоукрашается град наш, / Богородительнице, образом Твоим честным, паче луч солнечных сияющим / и просвещающим хвалящая Тя.

**Песнь 4**

**Ирмос:** Гóру Тя, благодатию Божию приосененную, / прозорливыма Аввакум усмотрив очима, / из Тебе изыти Израилеву, / провозглашаше, Святому, / во спасение наше и обновление.

**С** воинствы Небесными водворяяся, Богомудре, / Христа умоли с ними спасти нас на земли сущих, / почитающих тя в честном храме сем, Господень Предтече.

**С**ветильниче Света невечерняго, / угасший благих дел светильник возжги в душах наших, огнем твоих молитв, / да ясно узревше свет повелений Создавшаго, / стопы наша направим по словеси Его.

**Б**ездну милосердия в струях Иорданских погруживый рукою твоею, Крестителю, / источники слез подаждь, / разжения сластей погашающая и грехи очищающая.

**Н**еповинно заклан был еси, / яко агнец незлобив, Божественный Предтече, / непорочная и священная жертва Творцу принесся еси, / тем же верою тя молим, / и нас возносити жертвы духовныя Богу настави.

**Богородичен:**

**Н**е отрини молений наших, Владычице Чистая, / но посети милостию рабы Твоя, поклоняющияся образу Твоему, / упование христиан, / в мире житие наше соблюди и подаждь спасение необоримое.

**Песнь 5**

**Ирмос:** Просветивый сиянием / пришествия Твоего, Христе, / и осветивый Крестом Твоим мира концы, / сердца просвети светом твоего Богоразумия, / православных поющих Тя.

**Д**ивен Бог, во святых своих творяй чудеса, / кости бо мертвыя Елисеевы мертваго



воскресѣша, / руками Павловыми многи от недуг и духов злых исцелевахуся, / рука же Крестителя лева бѣольшая источает чудеса, / и подает исцеления верою почитающим ю / и благоговейно лобызающим.

**Приблизився Свету крайнему, / свет вторѣй по Божественному причащению был еси во истину, / темже радующеся светлую и благонаробчитую память твою совершаем, / и молим тя, Крестителю: / просвети души наша дарованиями Вседетельнаго Духа.**

**Не ходатай, ни Ангел, но Сам Господь, пришедый в мир, спасе нас, / Емуже правыя пути послан был еси уготѣвати, блаженне. / Того ныне умоли, Крестителю, / показати и нам стезю, к Царствию Небесному наставляющую.**

**Горесть вод древле услаждая Моисей, / древом сохрани еврейския люди, образ Креста проначертая, / сему вернии поклоняющаяся, горести и скорби всякия избавляемся.**

**Богородичен:**

**Се приходит Дева, всех пророков превышши, честным образом Своим, Зиждителя миру рождающая, / град Свой сохранить и спасти достоиние Свое.**

### **Песнь 6**

**Ирмос: Из утробы Иону младенца изблева морской зверь, / якова прият; / в Деву же всельшееся Слово, / и плоть приемшее пройде, сохраншее нетленну. / Егоже бо не пострада истления, / Рождшую сохрани неврежденну.**

**Глас вопиющаго Бога наречен был еси, Предтече Господень; / темже яко уста Божия, кто не восхваляет тя?**

**Веру благочестивую в Сына Божия / запустевшим сердцам проповедал еси, Пророче благодати, / неплодие душ наших, от тли греховных изсыхаемых на всяк день, / отреби рукою Твоею пречистою, / да будем дрeвеса приносящая плод живыя веры Вседержителю.**

**Волнами житейскими обуреваемы и в страстех различных погружаемы, / под кров твой прибегаем, великий Иоанне, / потщися помощи рабом твоим / и к спасения благоотшному пристанищу настави.**

**Приими** от души молящихся Тебе, Христе, / и даждь нам помощь Твою свыше, якоже иногда учеником Твоим на мѣри, / и от бед избави нас, молением Твоего Предтечи.

**Богородичен:**

**Пред** образом Твоим, Богомати, / проливаем сердечная моления наша недостойнии, / помози, Владычице, усердно молящимся Тебе, и избави от всех бед и зол славящих Тя; / кто бо, Всемиловитая, с верою призываяй Тя, / посрамлен и неуслышан от Тебе изыде?

**Кондак, глас 6:**

**Умнаго** Солнца светильник Божественный Предтеча, / показавый в концех светоносную свою десницу, / ныне на севере озаряет ею блаженное Отечество наше, / просвещая и освящая верно поклоняющихся, и Христу вопиющих: / спаси нас молитвами пророка Твоего, Царю Вышний.

**Икос:**

**Новый** рай является Божественный храм, / в ѓньже с верою и благоговением входит беседовати с Создателем своим первый человек. / Река бо даров Божественныя благодати, разделяющаяся в четыре начала, / исходит из Едема Небеснаго напаяти его. / Источник жизни, нетления и спасения / изливает всем нерукотворенное начертание Спасителя нашего. / Поток милостей и щедрот, и срѣднаго о христианех промышления / исходит от святыя Богоматере иконы. / Древо Креста, на немже спасение совершился, / источает воду, услаждающую гѳресть вкушения заповѣданнаго. / Струй же теплых молитв текут обильно от Предтечевы десницы, / во струях Иорданских сподобившиися крестити Просветителя нашего. / Вся земля Россійская да поклонится Тебе и да поет Тебе, Царю Вышний.

**Песнь 7**

**Ирмос:** Тебе умную, Богородице, пещь, / разсмотрим вернии; / якоже бо ѓтроки спасѣ три Превозносимый, / мир обнови, во чреве Твоем всецѣл, / хвальный отцев Бог, и препрославлен.



**П**рославляяй Господь Того сла́влящяя, / нетле-  
нием прославленную десницу твою, подаде вер-  
ным прибежище благонадёжно, / юже простёрши,  
подаждь нам помощь от Святаго, / и даждь без-  
бедно во благочестии жизнь совершити славя-  
щим тя.

**Т**воими молитвами немощнии врачуются, / де-  
мони отгоняются, и вся скорби рёшатся, / сего  
ради тя почитаем, Предтече Господень, / России  
похвало, крепость и ограждение, и утверждение.

**П**ригвождён ум к земным вещем имея, / что  
сотворим, и к кому прибёгнем ищущии помощи? /  
разве к тебе, святой Иоанне, благодати  
тезоимените, / не отрини нас от твоего заступле-  
ния, но возстави и обнови покаянием, / и понуди  
со избранными вни́ти, а́може ничтоже скверно  
входит, / в Царство Небесное.

**У**мири́ мир, Христе, мольбами Предтечи  
Твоего, / низлагая врагов силу и тишину неизгла-  
голанную устрояя стране нашей, / во веки  
сохрани́.

**Богородичен:**

**О**бразу Твоему поклоняющимся / и призыва-  
ющим Тя во обстоя́нних лютых, помози,  
Владычице, / упование и спасение всех  
человеков, / иныя бо Предстательницы, разве  
Тебе, по Бозе не има́мы.

### Песнь 8

**Ирмос:** Ч́уда преестественнаго / росодательная изо-  
брази пещь образ; / не бо яже при́ят пали́т юныя, / яко  
ниже́ Огнь Божества Девы, в Нюже вни́де утробу, / тем  
воспевающе воспоем: / да благословит тварь вся Господа, /  
и превозносит во вся веки.

**П**рисносущныя и неизреченныя Славы и Све-  
та невечерняго наслаждаяся, / идеже неизглаго-  
ланное есть веселие и радость непрестанная, /  
простирающих к тебе молений гл́асы услыши,  
Крестителю, / и сподоби молитвами твоими при-  
частниками быти вечныя Божественныя Славы.

**Д**ухом и силою Илиинóю предходя́ Христу, /  
был еси, премудре, не трость противными ветры  
колеблема, / но столп и наше Божественное веры

утверждение, и непоколебимое Церкви укрепление, / юже твоим ходатайством во единомыслии соблюди непреклонну и недвижиму, / утоля всякия соблазны.

**Авраам** яко друг Божий / сподобився духом провидети день Зиждителя Своего, / радости неизреченныя исполняшеса; / ты же, Предтече, не в гаданиих и сенех, / но лицом к лицу зря воплотившагося Господа, и от руки твоея крещение приѣмша, / достойно взывал еси: / сия убо радость моя исполнися. / Сего ради, яко друга Христова и теплаго о нас предстателя / правостию ума чтуще, ублажаем,

**Троицен:**

**Троицу** Нераздельную, / Трѣми Лицы разделяемую, соединяемую же Существом, / всеми державно владычествующую и вся соблюдающую, / вернии благочѣстне исповедающе, возвеличим.

**Богородичен:**

**Приими** моления рабов Твоих, Пресвятая Владычице, / яже Тебе приносим; / помози и от бед избави поклоняющихся образу Твоему; / Ты бо, Спаса Рождшая, имаши дерзновение, яко Того Мати сущи, / не престай молящи о чтущих Тя, еже спастися нам.

### Песнь 9

**Ирмос:** Образ чистаго Рождества Твоего / огнепалѣмая купина показѣ неопальная, / и ныне на нас напѣстей свирепѣющую угасити молимся пещь, / да Тя, Богородице, / непрестанно величаем.

**Стал** еси посреде закона и благодати, премудре, / темже взываем к тебе: / побеждаемых нас законом греховным, воюющим противу ума во удох наших, ущедри, Крестителю, / и благодати дар испроси, творити Божественная хотѣния.

**Утробы** неплодныя изращѣние плодовитое сый, / неплодие сердец в благоплодие претвори молитвами твоими, / и капли покаяния спасительнаго ождѣ в сердцах поющих тя.

**Источая** всегда исцеления притекающим к мощем твоим, чудный Предтече, / исцели страсти сердечныя, востающия от невнимания, / дѣтельную твоих Божественных молитв цельбоу.



**Витийствующих язык** не может по достоянию восхвалити тя, Предтече пришествия Христова; / но якоже Христос вдовицы прии́ два лѣпта, / не возгнушайся, Крестителю, малаго сего приношения; / благодти же подражанием, прими песнь, яко достойную / и дерзнувшаго от усердия повѣдати величия твоя.

**Богородичен:**

**Взирающе на твою всечестную, Пречистая Богомати, икону, / яко на Тебе Самую, на Небесех Сыну соцарствующую, / с верою к ней припадаем, благочестно почитаем, и со страхом лобызаем, / и славим рождшагося от Тебе Христа Бога нашего, / Егоже моли спасти рабы Твоя.**

**Светилен:**

**Предстоя присно страшному Престолу, / и светлыми зарями Трисолнечнаго Божества осияваем, светильниче мира, / просвети души верою приступающих к Тебе, / греховный мрак отгоняя и приводя тѣя к Свету незаходимому.**

**Слава, и ныне, Богородичен:**

**Скорая в бѣдахъ Помощнице, / готовое обуреваемых пристанище, / Неискусобрачная Невесто, рождшая плотию Спасителя миру, / сохрани нас, поклоняющихся образу Твоему честному и сице Тебе взывающих: / радуйся, Предстательнице Твоих рабов.**

**На хвалитех стихиры на 4, глас 1:**

**Память праведнаго с похвалами, / хвала бо его сладость верным, / блажен воистинну, егоже избра и прии́т Господь; / темже и мы днесь, веселящися, почитаем память твою, Предтече, / просяще тя, имущаго дерзновение ко Господу, / молитися о благополучии страны нашея, / о победе на языки противныя, еже низложити неправедно хотящия брани, / даровати же мир миру, Церквам единомыслие, / и душам нашим велию милость.**

**От запада принесшая благодать исцелений рука твоя, Крестителю, / созывает верных к тоя пришествию. / Входу ея православный народ радуется, / священных сословие благоговеет и**

торжествует свѣтло;/ собравшееся же верных множество усердно покланяется,/ веселия духовнаго исполняяся./ Ты же, ходатай Новаго и Ветхаго быв священнейший,/ обнови обветшание, обновление совершающих/ новаго явления десницы твоя,/ моля Человеколюбца даровати всем спасение и велию милость.

**Давиду** кроткому и благочестивому уподобляется священных собрание,/ радостно преносащее в храм, якоже древле в Сион,/ новый кивот древняго пречестнѣйший./ Тамо бе стѣнна, манну носящая,/ где же образ во чреве Носившия Христа;/ тамо жезл, где же Крест Христов, вселенныя хранитель;/ тамо скрижали каменни Ветхаго Завета,/ где же рука, предназначающая Новый Завет,/ возвещающий миру спасение и велию милость.

**Боговидец** предивный Илия,/ повѣрже мѣлоть свою на Елиссея,/ и абие сей остави воли, имже делаше землю,/ идяше в след его и служаше Богу;/ ты же, Крестителю, не ризу,/ но руку твою святую ниспослал еси нам, рабом твоим,/ еуже да излиѣтся на нас благодать Духа Божественнаго,/ во еже не земным и суетным работати,/ но Богу Живу служити преподобием и правдою/ вся дни живота нашего,/ подающему миру велию милость.

**Слава, глас 8:**

**Вси** совокупльшися единомысленно во святем храме Спаса нашего,/ и зряще в нем светлый Богоматере образ, Живоносное Древо Креста и твою, Предтече, пречестную руку,/ руце и сердца горѣ воздвигнем к Триипостасному Божеству,/ радуящися о великих Его дарованиих, и молящися прилежно,/ да предстательством Всенепорочныя, силою Честнаго и Животворящаго Креста,/ и твоими, всеблаженне, молитвами,/ посетит нас милостию и щедротами Всеблагий Бог,/ подающий миру велию милость.

**И ныне, глас 8:**

**Со** всеми пророки, со апостолы, и мученики,/ преподобными, и праведными, и всех христиан



надеждою — Богородицею, / моли Преплагаго Бога, Предтече, / даровати совершающим светоносную и Божественную память твою, / разрешение грехов, очищение прегрешений и велию милость.

Славословие великое и отпуст.

На Литургии: Блаженны. Прокимен, глас 7: Возвеселится праведник о Господе: Апостол к Коринфяном, зачало 106. Аллилуиа, глас 4: Праведник, яко финикс, процветет: Евангелие от Матфея, зачало 40. Причастен: В память вечную: На молебне Евангелие от Марка, зачало 1.



## Преподобных отец Дионисия и Амфилохия Глушицких, чудотворцев

НА ВЕЧЕРНИ

Блажен муж: на Господи, возвах: стихиры, глас 8.

Подобен: О. преславнаго чудесе:

Преподобнии отцы Богомудрии, / слепым даёте свет, / болящим исцеление и хрым здравие, / милостивно преклоняющесе к приходящим верою к вам / и просящим помощи ва́шей, / заступники бо и предстатели вернии вси обрето́хом, восхваляюще вас.

Преподобнии отцы всечестнии, / добродетельми возшедше на колесницу, / к Богу востекосте, победныя почести приемлюще, / и, яко мило́ть, нам телеса́ ваша положена во гробех отцы оставили есте́, / источати исцеления и прогонити духи лукавые, / тем же блажим вас, прехвальнии.

Ликом постническим сочестаетесе и украшешесе, блаженнии, / постническим житием и ныне в Небесных обителех живете, веселящесе, / идеже ликують Ангели, / и Светом Божественным воистину обожаеми, / поминайте любовь блажащих вас на земли / и святое ваше творящих празднество.

Слава, глас 6:

Преподобнии отцы, / во всю землю изыде вещание исправлений ваших, / темже на Небесех обрето́сте мзду трудов своих, / бесовския разрушили есте полки́ / и Ангельския достигли есте

В  
ТОЙЖЕ  
ДЕНЬ

чины, / ихже житию непорочно поревновáсте, / дерзновение имúще ко Господу, / мир испросíte душам нашим.

**И ныне, Богородичен:**

**Богородице Дево Чистая, / молися Гóсподеви, / яко да Твоими молитвами / подаст душам нашим грехов оставление, / мир и велию милость.**

**Крестобогородичен:**

**На Древе Живот наш зрящи, / Пренепорочная Богородица, вísящ, / мáтерски рыдающе, вопиáше: / Сыне Мой и Боже Мой, / спаси любовию поющия Тя.**

**Аще празднуеши с полиелеом, глаголи Богородичен воскресный: Кто Тебе не ублажит: Вход, прокимен дне.**

**Чтения преподобническая (зри страницы 791—792)**

**На стиховне стихиры, глас 4.**

**Подобен: Яко добля:**

**Во Христа облéкшеся, / тлéемаго человека Богомудренно совлекшеся, / тем духовною благодатию присно просвещáеми, / яко звезды светлыя, мíрове просияли естé, / молящеся от тли и бед избáвиться, / иже верою совершающим присно честнóю память вашу.**

**Стих: Честнá пред Господем / смерть преподобных Его.**

**Ныне пищу Небесную восприемлюще, / и Светом ограждаеми, и Жизнь вечную наслéдствующе, / к вам прибегающия от бед избáвите, / и искушений различных, и всякаго озлобления, / Богомудренно к Богу дерзновение стяжавше / и любовь показúюще воистину хриестоподобную.**

**Стих: Блажён муж, бойся Господа, / в заповедех Его восхóщет зело.**

**Богоносцы вседívнии, Троицы поборницы, / к миродержителеву борению мúжескою мудростию ополчívшеся, / и того низложисте твердыми сплетéнии, / победными увязóстеся венцý. / Сего ради Божественную и светоносную совершаем вашу память, / освящаеми благодатию.**

**Слава, глас 8:**

**Преподобнии отцы, / мира красоты и пищи временныя отнюд возненавидевше, / иноческое**



житие паче возлюбивше / и Ангелом собеседницы  
бысте, / и светильницы многосветлии вселенней, /  
чудесами, якоже второе солнце, сияюще, / всех  
нас поминайте, / совершающих священную па-  
мять вашу. / Мы бо, чада ваша / и овцы словес-  
ных ваших учений, / и вас на помощь  
призываем, / просяще вами прияти мир и велию  
милость.

**И ныне,**

**Богородичен воскресен: Безневестная Дево:**

**Аще ли не празднуеши, глаголи сей Богородичен:**

**Аз, Дево Святая Богородице, / под кров Твой  
прибегаю, / вем яко обрящу Тобою спасение, /  
можеша бо, Чистая, помощі мне.**

**Крестобогородичен:**

**Тя пригвождаема видяци на Кресте, Иисусе, /  
и страсти приемлюща волею, Владыко, / Дева  
Мати Твоя, увы Мне, вопияше, Чадо Сладкое, /  
раны без правды како терпиши, Врачу, / исцели-  
вый человеком немощь / и от тли всех избавивый  
милосердием Своим.**

**Тропарь, глас 8:**

**Светильницы светлии, явльшеся / доброту зем-  
ную мудренно оставльше / и идоша во внутрен-  
нюю пустыню, купно с Дионисием Амфилохие, /  
смирение и всю добродетель извыкоша и обрето-  
ша безсмертие, / постом, и бдением, и прочим  
воздержанием себе принося Христу, / и ныне на  
Небесех Престолу Христову предстоя, / молятся,  
отцы Богомудрии, Дионисие и Амфилохие, / уми-  
рити мир и спастися душам поющих вас, / согре-  
шением оставление даровати, / чтущим всече-  
стную память вашу.**

**Слава, и ныне, Богородичен или Крестобогородичен.**

**НА УТРЕНИ**

**По 1-м стихословии седален, глас 4.**

**Подобен: Скоро предвари:**

**Светильницы пресветлии истины Христовы, /  
мир просветисте учением вашим, отцы Богонос-  
нии Дионисие и Амфилохие, / погубивше ереси  
зловверных хульник, погасисте пламенная хуля-**

щих смущения, / тем яко Христовы угодницы  
всех просвещаете.

Слава, и ныне, Богородичен:

Деве Всенепорочная, Пребогатаго Бога  
рождшая, / со Безплотными Того непрестанно  
моли, оставление прегрешений и исправление  
жития дати прежде конца, / верою и любовью  
поющим Тя.

По 2-м стихословии седален, глас 8:

Отрекóстеся плоти Христа ради и духовнии  
явистеся людем водителие, / услышали естé сло-  
весá тайных учений, / иноком же явистеся прави-  
ло правости, / страсти вся крепостию попрали  
естé. / Тем и коварства бесóв до конца попалили  
естé, / к Нему изрядно всегда, Богоноснии отцы,  
молитеся, / грехов оставление подати, чтущим  
любовию святую память вашу.

Слава, и ныне, Богородичен:

Се Тебе рóди родóв славят, якоже прореклá  
еси, Отроковице, / Создателя бо всех бысть пала-  
та и Божественный храм, / в немже вселися  
Вышний и плотию обложися, да спасет нас.

По Хвалите Имя Господне: величание:

Ублажаем вас, / преподобнии отцы, / и чтим  
святую память вашу, / наставницы монахов и  
собеседницы Ангелов.

Псалом избранный: Терпя, потерпéх Господа:

По полиелеи седален, глас 8.

Подобен: Премудрости:

Егда, блаженнии, к Божественному желанию  
ум свой вперисте, / тогда остависте вся дóлу  
влекúщия мудрòвания и в пустыню всельшеся, /  
яко крин, процветосте добродетельми прекрас-  
нии, страстей искоренивше терние, / в ней наса-  
дивше плоды трудов своих, / темже и пожасте  
рукояти, богатство неотъёмлемо на Небесех, /  
отцы преподобнии, молите Христа Бога / согре-  
шений оставление даровати, чтущим верою свя-  
тую память вашу.

Слава, и ныне, Богородичен: О Тебе радуется:

Таже степенна, 1-й антифон 4-го гласа. Прокимен: Честна́  
пред Господем / смерть преподобных Его. Стих: Что



воздам Гбсподеви о всех, / яже воздаде ми. **Всякое дыха-**  
**ние: Стих: Хвалите Бога во святых Его: Евангелие от**  
**Иоанна, зачало 36.**

По 50-м псалме стихира, глас 6:

**Иже на земли Ангели / и на Небесї человецы**  
**Божии, / мира благое украшение / и благих**  
**питателей, / удобрение иноков и преподобных**  
**похвалу / великих отцев почтим, / насаждени бо в**  
**дому Господни / и процветоша праведно, яко**  
**кедри в пустыни, / умножили естє стадо Христо-**  
**во словесных овец, / в преподобии и правде.**

Канон, глас 6.

Песнь 1

**Ирмос: Яко по суху пешешествовав Израиль, / по**  
**бездне стопами, / гонителя фараона, / видя потопляема, /**  
**Богу победную песнь поим, вопияше.**

**Сшедшаго с Небес и на Кресте рўце Простер-**  
**шаго подражатели, блаженнии, / тем распясте**  
**себе миру, и мир вами распинашеся, / и сего**  
**ради вселїстеся во Царствие Небесное, / чудот-**  
**ворцы явїстеся воистину предївнии.**

**Творца всех Бога возлюбїсте, преподобнии, /**  
**мирскую мудрость всю отвѣргше, о земных**  
**нерадївше, / Небесных благ насладївшеся со**  
**Ангельскими лїки, / с нимиже молящеся, не забў-**  
**дите нас, чад своих.**

**Ревность духовную в сердцах своих**  
**приемше, / вслед Бога усердно потекосте и сего**  
**ради прославистеся в Божественней Того славе, /**  
**у Него же обрестї нам испросїте велию милость.**

Богородичен:

**Един от Святыя Троицы во двою естествоу / от**  
**чистых кровей Твоих воплотїся, Боголепно**  
**прїйде, / ихже от Адама спасая, Пречистая,**  
**благостию Своею.**

Песнь 3

**Ирмос: Несть свят, / якоже Ты, Господи Боже мой, /**  
**вознесїй рог верных Твоих, Блаже, / и утвердївый нас**  
**на камени / исповѣдания Твоего.**

**Бысть в пустынях гнездящася Ангели, добро-**  
**детельным житием своим мир озаряюща, / Дионї-**  
**сия блаженнаго обрете, преподобне Амфилѳохие, /**  
**ему же последствовав, Спасу всех угодил еси.**

**М**олением своим непрестанным и всенощным предстоянием, / Пречистую Богородицу Помощницу имуще, бесовския полки от обители вашей прогонили есте. / Тем и приходящим к вам подаваете скорое исцеление.

**Се**, мы оставихом вся, / по Господню словеси сотворите и вслед Того изыдите, / тем мзду сторичную прийте и Живот вечный наследовайте со всеми святыми, / с ними же молящися о нас не престаите, отцы блаженнии.

**Богородичен:**

**П**росвещение мне испроси, Пречистая Владычице, / рождающая Свет всему миру, омраченному грехи, / страстную мглу далече отжени, Единая Богоблаженная.

**Седален, глас 4:**

**У**дивил еси, Владыко, преподобных отец наших, / подав им чудес благодать и недуги различные от человек отгоняти, / им же молебно возопием: / о, отцы досточуднии, Дионисие и Амфилохие, / непрестанно молитесь о нас Пречистую Богородицу, / да, простерши длани, умолит Сына Своего и Бога, / сохранить град наш и люди от злых обстоятельств, / подаст верным людям победу на враги / и душам нашим грехов оставление.

**Слава, и ныне, Богородичен:**

**П**речисти руце Твои, Богородице Дево, простерши, / покрый уповающих на Тя, Сыну Твоему зовущия, / всем подай, иже милости Твоя.

**Песнь 4**

**Ирмос:** Христос моя сила, / Бог и Господь, / Честная Церковь / Боголепно поет, зывающи, / от смысла чиста о Господе празднующи.

**Р**уце простерше, о нас мольбу ко Владыце приношайте, / стаду вашему от долг разрешение просяще, имате бо послушающаго Владыку всей твари, / творит бо волю боящихся Его и молитву их послушает.

**С**кончаєте течение, житие свое добре совершивше, блаженнии, / приятелище бысте Пресвятыя Троицы, / тем молитесь в мире сохраненным



быти верным людем, / правоверно вас почитающим.

**Любовию Божию распалаетесь, святии, / мир весь оставльше, пустыню достигóте, / в ней же Ангельски пожили естé и ныне, в Чертозах Небесных со всеми святыми веселящеся, / непрестанно о нас молитесь.**

**Богородичен:**

**К Тебе упование мое возложих, Мати Божия Приснодево, спасения моего / и Тя Предстательницу животу моему положих, твердо же и непоколебиму.**

### Песнь 5

**Ирмос: Божиим светом Твоим, Блаже, / утренюющих ти души любовию озари, молюся, / Тя ведети, Слове Божий, / Истиннаго Бога, / от мрака греховнаго зывающа.**

**Смирён помысл и душу свою сокрушенную имуще, / вьну прилепляшеся Бóгови и на Того упование о души своей возложше, / толпы бесовския, яко прах, разгнасте, / исцеляете недуги душевныя вкúпе и телесныя.**

**Юность телесную отвергше, / постóm и бдением удручили естé плоти своя, / тем и святым житием своим весь мир просветили есте, Богоблаженнии.**

**Егоже ищущи, присно желаемаго вами блаженства Небеснаго Царствия, / о нем бо подвизаетесь в пощениих и бдениих, / души свои издасте в руце Божии; / сему и нам получи́ти молитесь присно, блаженнии.**

**Богородичен:**

**Тебе, рождши Христа, всему Содетеля, зываем: / радуйся, Иже Свет возсиявше нам, / радуйся, вместившая Бога невместимаго.**

### Песнь 6

**Ирмос: Житейское море, / воздвизáемое зря напастей бурею, / к тихому пристанищу Твоему притек, вопию Ти: / возведи от тли живот мой, / Многомилостиве.**

**Возгремели быша до Небес молитвы ваша, святии, / яко гром, Святым Духом гремяше, / воздушный же дух, яко дым, разгоняше, / от недуг разрешение верным подавающи. / Тем яко за-**

ступники наша и к Богу ходатаи, / непрестанно вас почитаем.

**Вышняго** прибежище положите себе и упование, в пустынях, да яко в чертозах светлых, пребывающе, / во алчбе и жажде жизнь свою провождающе, / тем и обители себе во имя Пресвятыя Богородицы сотворите, Еяже молитвами от зол нас избавите.

**Игу** Господню вья преклонше, житейских молв избегосте, / тесным и прискорбным путем шествовавше, / пространства онаго Небеснаго достигли есте, / егоже и нам сподобленным быти, святии, молитесь.

**Богородичен:**

**Пречистая** Богородице Владычице, рождшая человеком Христа Спаса нашего, / подаждь ми грехов оставление, да сподоблен буду избыти вечных мук нескончаемых, / заступление Твое стяжавше, Богоневестная.

**Кондак, глас 8:**

**Яко** светила незаходямая мысленнаго Солнца, просветите вселенную, / верным души и телеса лучами чудес ваших озаряюще, / независтно подаваете от недуг исцеление, / темже, сошедшеся верою, вас в песнях восхвалим, / яко наши премудрыя наставники и к Богу ходатаи, / и непрестанно вопием: / радуйтесь, отцы Богомудрии Дионисие и Амфилохие.

**Икос:**

**Кто** изреши может ваша на местех сих труды и страдания, отцы Богоноснии, / или кто исповесть прежде смерти и по смерти, яже ваше к Богу дерзновение, / ибо во плоти Безплотным подобящися, Ангельски поживше, / добродетельми своими весь мир просветили есте. / Но, аще и худословен есмь, / но убо воспою и, поя, не престаю Божию силу и премудрость / и преподобных терпение и подвижи, сие рекуще: / радуйся, Дионисие, великий отче наш, / яко измлада Богу послужил еси и к Нему достигл еси в Небесное Царствие; / радуйся, целомудренный столпе, Амфилохие преподобне, / имже попрося всякая



кознь сопротивная;/ радуйся, чюдный Дионисие,/ ибо терпением своим, яко безплотен, Ангелы удивил еси, лукавых бесов победивый;/ радуйся, Амфилохие блаженне,/ мысленнаго райа грозд пресладкий, усладивший весь мир пресладким житием своим;/ радуйся, Дионисие Богомудре,/ прекрасное жилище Пресвятаго Духа;/ радуйся, Амфилохие всечестне,/ яко на Небесех предстоиши Пресвятей Троице с преподобным Дионисием, о нас молишися непрестанно;/ радуйтесь, отцы наши вселюбезнии,/ наставницы иноком премудрии, и ко Христу сих приведосте преподобно и праведно;/ радуйтесь, отцы досточуднии,/ светильницы пресветлии, весь мир в чудесех просветили есте и, просвещая, не престаёте./ Темже, вопиюще, вси рцем непрестанно:/ радуйтесь, отцы Богомудрии, Дионисие и Амфилохие.

### Песнь 7

**Ирмос:** Росодательну убо пещь / содела Ангел/преподобным отроком,/ халдеи же опаляющее/велеие Божие мучителя увещая вопити:/ благословен еси Боже отец наших.

**В**менившие умёты вся, яже на земли суцая,/ всяко желание и тщание покажете, взыскающе,/ да Христа приобрящете,/ Егоже обрётше, посещайте шествующих путем вашим,/ ихже снискасте трудами своими, отцы блаженнии.

**На** Небеси пребывающе,/ неотступно с нами пребудите, назирающе нас, чад своих,/ непрестанно молитву к Богу, отцы, о нас сотворите,/ яко да молением вашим от всех зол нас избавите.

**Ни** оны пустынная страшлища устрашиша вас,/ ни человек злых нахождения, ни лукавых бесов прещения,/ ни лет долготы, ни скудость местная,/ но вся преодолёше терпением,/ и сего ради со Христом царствуете в нескончаемыя веки.

### Богородичен:

**Тя,** Богомати, спасение познахом, земнии,/ яко Творца плотию рождающая,/ темже спаси мене заблуждшаго,/ в пути правыя настави мя,/ повелением Божественным грехов прощение подавая

ми, / яко Человеколюбива, Преплагая Помощнице.

### Песнь 8

**Ирмос:** Из пламене преподобным росу источил еси / и праведнаго жертву водою попалил еси: / вся бо творishi, Христе, токмо еже хотети, / Тя превозносим во вся веки.

**Светила великая, чудотворцы предивнии, Дионисие со Амфилохием, / посетите нас в болезнях наших, / здравие всем притекающим к вам вскоре подавающе, / разрешите нас от греховных уз, / туне прийте, туне и дадите нам.**

**Якоже обещаестеся спожити неразлучно в жизни сей, / сице и по смерти вашей изволисте погребенным быти единым телесем вашим, / от них же чудес изливаете требующим исцеление, и Христа непрестанно славающим.**

**Ночь, яко день, вменяшеся вами, преподобнии, / не давше покоя телесем вашим, ни веждама дремания, / но безпрестани течение творяще к Богу постом и молитвами, / дондеже сподобистеся прияти праведных селение.**

#### Богородичен:

**В рождестве болезни избежала еси, Чистая, / и, рождши, паки Девою пребыла еси, / вся бо творит Иисус Бог и Человек, / Егоже превозносим во веки.**

### Песнь 9

**Ирмос:** Бога/человеком невозможно видети, / на Негоже не смеют чини Ангельстии взирати: / Тобою бо, Всечистая, явися человеком/Слово Воплощенно, / Егоже величающе, / с Небесными вои Тя ублажаем.

**Равно Ангелом житие стяжал еси, Дионисие, / тем равноангельна в пустынях крьющася, обретя блаженный Амфилохий, / и сего ради соревноваше ти в житий твоём, / твоему внимающе нраву Боголюбезному.**

**Подобящеся Христу своему, / кротко житие и смиренно в жизни сей стяжали есте. / Тем и покой обретосте душам вашим, / егоже ради жизнь сию во слезах и в воздыханиях изнурили есте.**

**Моление сие не презрите, отцы досточуднии, / иже от недостойных уст моих вам приносимое, /**



и, прияв, сего донесите Творцу и Богу, / просяще у Него обрести милость во вся веки.

**Богородичен:**

Сына Безлетна от Отца Ты, во утробе несканно зачѣнши, родила еси, Богомати Пречистая Дево, / моли непрестанно о рабѣх Твоих Того яко Человеколюбца Бога спасти род наш.

**На хвалитех стихиры, глас 4.**

**Подобен:** Дал еси знамение:

Светлейше просиявше, якоже солнце, преподобнии, / всепразднственная память ваша лучами облистѣема / ваших добродетельных деяний, блаженнии, / и озаряюще верных чувства светом чудес ваших. / Сию убо празднующе, / радостно вас восхваляем и верно ублажаем.

Якоже друзии Ангели земнии пожѣли естѣ, / воздержанием тело свое удручивше, всеславнии; / бдением и памятию смертною прилежно помышляюще, / Божественнии отцы, возвращаху / и великими восхожденіи к желанию верховному. / Тем воистину приближилися есте / к Самому Христу, камению краеугольному.

Страсти телесныя воздержанием утолили естѣ, / и прилежным молѣнием / змия льстиваго слезными потоки удавили естѣ, / отцы преподобнии, / и угодили естѣ Богу паче ѿних, досточуднии. / Тем вас украси Небесными дарованьи Иисус Человеколюбец / и Спас душ наших.

**Слава, глас 8:**

Преподобнии отцы, / поучѣстесь день и ночь в законе Господни, / достойни бысте древа Животнаго, / садове бысте / и плод ваш страданьи и венцы процветѣ. / Дерзновение имуще к Подвигоположнику Христу Богу, / и нам просѣте очищение и велию милость.

**И ныне, Богородичен:**

Владычице, прими молитву раб Твоих / и избѣви нас / от всякия нѣжды и печали.

**Крестобогородичен:**

Пречистая, яко узре Тя плотию висяща на Кресте / и, сердцем растерзающесе, вопияше,

слезящи:/ Слове, камо зайде, прелюбимый Иисусе,/ Сыне Мой, Господи,/ не остави Мене едину, Христе, Рождшую Тебе.

Аще имать на стиховне Слава, и ты глаголи вечерню. И ныне, Богородичен или Крестобогородичен.

В  
ТОЙЖЕ  
ДЕНЬ



### Празднование Пресвятёй Богородице ради иконы Ея Иерусалимския

Тропарь, глас 4:

Богорадованная Владычице,/ препрославленная Мати щедрот и человеколюбия,/ всемилостивая о всем мире Ходатаице!/ Прилежно раби Твои ко Твоему предстательству прибегаем,/ и ко пречудному образу Твоему со умилением, припадающе, молимся:/ молитву теплую Сыну Твоему и Богу нашему сотвори,/ о Всепетая Царице Богородице,/ да от всяких болезней и печалей нас Тебе ради избавит,/ и от грехов всяких свободив,/ Царствия Своего Небеснаго наследники ны покажет:/ велие бо и неизреченное яко Мати к Нему дерзновение имаши/ и вся от Него испросити можеши,/ Едина во веки преблагословенная.

Ин тропарь, глас 3:

Твоего предстательства уверение/ и милосердия Твоего явление/ икона Иерусалимская нам, Владычице, показася/ пред нею же души наша в молитве изливаем/ и верую Тебе вопием:/ воззри, Милосердая, на люди Твоя,/ вся скорби наша и печали утоли,/ утешение благое в сердца наша низпосли/ и спасение вечное душам нашим, Пречистая, испроси.

Кондак, глас 5:

Не отрини, о Милосердая Мати,/ слез и вздыханий наших,/ но прошения наша милостивно приемши,/ пред Иерусалимскою иконою Твоею/ молящихся людей веру укрепи,/ умилением сердца их исполни,/ и крест земнаго жития нести им помози,/ елика бо хоцещи можеши.



ЗРИ

Сии припевы поются на Святой Афонской Горе  
в праздник Иерусалимския иконы Божия Матере.

**Величай, душе моя, / Чистую Деву и Едину Богородицу.**

**Ангели, благодать к нам Пречистыя зряще,  
удивишася, / како Дева вниде иконою Своею во храм сей  
святый.**

**Ангели дивятся величию Твоему, Всецарице, / и мы,  
бреннии, чудесем, ихже иконою Твоею совершила еси.**

**Ангели радуются славе Твоей, Дево, / веселимся и мы,  
довольнии, припадающе ко иконе Твоей.**

**Ангели на Небеси Тя, Богородице, воспевают, / и мы  
славим zde, в дому Твоем, лобызающе дивную икону Твою.**

**Ангели ублажают милосердие Твое к людям, / благода-  
рим Тя и мы, Мати Божия, празднующе иконе Твоей.**

**Ангели славят промысление Твое о верных, / и мы поем  
Тя, явльшуюся нам на помощь Своим образом.**

**Величай, душе моя, / благодать Оставившую верным во  
святых иконах Своих.**

**Величай, душе моя, / Всемиловитую Владычицу, ико-  
ною Своею обитати zde изволившую.**

**Величай, душе моя, / Препоблагословенную Марию, освя-  
щающую ко иконе Ея притекающих.**

**Величай, душе моя, / Святою Троицею Избранную  
спасения ради нашего.**

**Величай, душе моя, / Благословенную в женах, иконою  
Своею благословившую нас.**

### Молитва

**Пресвятая Госпоже, Владычице Богородице,  
упование всех уповающих на Тя, Заступнице  
печальных, прибежище отчаянных, вдов и сирот  
Питательнице! Услыши и помилуй ны, грешныя  
и недостойныя рабы Своя, со умилением ко  
пречистому Твоему образу припадающия: умоли,  
Милосердая Владычице, Сына Твоего и Господа  
нашего Иисуса Христа, да отвратит от нас  
праведный гнев Свой, да простит грехи и безза-  
кония наша, яко да сподобимся благостию Его  
скончати житие наше в покаянии и получитьи  
милость Его со всеми избранными Его, яко благо-  
словена и препрославлена еси во веки веков.  
Аминь.**

